

**YOSHLARNI KASB-HUNARGA YO`NALTIRISH DOLZARB
MUOMMO SIFATIDA*****To'rayeva O'g'iloy Erkin qizi****Jizzax viloyati Zomin tumani**61-maktab amaliyotchi psixologi.*

Annotatsiya: Yosh avlodni kelajakda yetuk mutaxassis bo'lib yetishishi uchun ularni kasb-hunarga to'g'ri yo'naltirish, yo'nalishni to'g'ri tanlashlariga ko'maklashish yoshlarni kelajagida muhim o'rin tutadi.

Kalit so'zlar: Kasb-hunar, kasbiy tanlov, ijtimoiy-kasbiy moslashuv, mas'uliyat, mehnat, oila, jamiyat.

Har qanday jamiyat, jamiyatning kichik bo'g'ini bo'lmish-oilaning taraqqiyoti, boyligining manbayi, insoniyat tomonidan moddiy va ma'naviy boylik yaratishning asosiy omili mehnatdir. Jamiyatning ijtimoiy shakli qanday bo'lishidan qat'i nazar, mehnat moddiy va nomoddiy ne'matlar ishlab chiqarishda zarur faoliyat bo'lib qoladi. Prezidentimiz Sh.M.Mirziyoyev ta'kidlaganidek, iqtisodiy islohotlar va ijtimoiy o'zgarishlarning samarasi, birinchi navbatda, aholining moddiy ahvoli va farovonligiga, uning hayot darajasi hamda sifatiga qay darajada ta'sir ko'rsatayotgani bilan o'lchanadi. O'zbekiston Respublikasi Prezidenti Sh.M.Mirziyoyevning 2022-yil 20-dekabrda Oliy Majlisga va O'zbekiston xalqiga Murojaatnomasida ta'kidlaganidek, odamlarimizni kasb-hunarli qilish, ularning biznesiga keng yo'l ochish, haqiqiy mulkdor bo'lib, daromad topishi uchun zarur sharoitlarni yaratish davlatning asosiy vazifalaridan biri hisoblanadi.

Buning uchun yosh avlodni ta'limning eng quyi pog'onalari-maktabgacha va maktab ta'limi jarayonida kasb-hunarga to'g'ri yo'naltirish lozim. O'quvchilarni kasb-hunarga yo'naltirish tizimi kasbiy targ'ibot va tashviqotni o'z ichiga olgan kasbiy ma'rifat (kasbiy axborot); u yoki bu soha, kasbga bo'lgan shaxs qiziqish va qobiliyatlarining birlamchi kasbiy tashxisi, kasb tanlashda mutaxassislar tomonidan individual, guruh yordam ko'rsatishga qaratilgan kasbiy maslahatlar, ko'proq muvofaqiyatga erishishi mumkin bo'lgan kasbni tanlab olishga qaratilgan kasbiy tanlov, ishlab chiqarish amaliyoti jarayonida amalga oshiriluvchi ijtimoiy-kasbiy moslashuv, tanlangan kasbni o'rganish jarayonida burch, mas'uliyat, kasbiy or-nomus hislarini o'quvchilarda shakllantirishga qaratilgan. Undan ko'zlangan maqsad o'quvchilarga kasblar olami, kasblarning belgi va xususiyatlari, kasb klasifikatsiyasi, kasblar professiogrammasi, hududning qaysi kasblarga ehtiyoji borligi to'g'risidagi axborotlarni berishdan iborat bo'lib, ular asosida o'quvchi o'zini qiziqtirgan, jamiyat uchun zarur bo'lgan kasbni tanlaydi. Bugungi kunda Prezidentimiz tomonidan

mamlakatimizni rivojlantirish uchun kelajagimiz poydevorlari bo'lgan yosharimiz oldiga juda katta maqsadlar qo'yib, ularga yuksak ishonch bildirilmoqda. Oldimizga qo'ygan buyuk maqsadlarimizga, orzu-niyatlarimizga erishishimiz, jamiyatimizning yangilanishi, hayotimizning taraqqiyoti va istiqboli amalga oshirilayotgan islohatlarimiz, rejalarimizning samarasi taqdiri – bularning barchasi, avvalambor, zamon talablariga javob beradigan yuqori malakli, ongli mutaxassis kadrlar tayyorlash muammosi bilan chambarchas bog'liqligini barchamiz anglab yetmoqdamiz. SHu bilan birga, hammamiz yana bir haqiqatni anglab yetmoqdamiz. Faqatgina chinakam ma'rifatli odam inson qadrini, millat qadriyatlarini, bir so'z bilan aytganda, o'zligini anglash, erkin va ozod jamiyatda yashash, mustaqil davlatimizning jahon hamjamiyatida o'ziga munosib, obro'li o'rin egallashi uchun fidoyilik bilan kurashishi mumkin.

Ijtimoiy taraqqiyotni ro'yobga chiqarish uchun mamlakatda yuqori malakali mutaxassislarni tayyorlash va ularni jahon standartlari darajasiga ko'tarmoq lozim, fan va texnikaning bugungi kun taraqqiyotiga javob berish uchun keng saviyali, bilimdon, o'z kasbining fidoiy kishisini kamol toptirish orqali davlatimizda bozor iqtisodiyotiga bardosh beradigan, raqobatbardosh mahsulotlar yaratuvchi kasb egalarini shakllantirish joiz. Toki ular davr talablariga og'ishmay javob beradigan, qiziqishi keng, malakasi mustahkam, xotirasi barqaror, fikr yuritishi puxta, izlanuvchan, mehnatsevar, vatanparvar, iymon-e'tiqodli, barkamol insonlar bo'lib voyaga yetishadi. Buning uchun uzluksiz ta'lim tizimining barcha jabhalarida o'quvchilarni kasbga yo'naltirishning ahamiyati kattadir. Aytish mumkinki, barkamol insonning shakllanishi, uning munosib kasb-hunarni egallashi, jamiyat taraqqiyoti uchun baholi qudrat o'z hissasini qo'shib, yashashi va shu orqali jamiyatda o'zligini namoyon etishi, ya'ni shaxs sifatida kamol topishi nazarga olinadi. Komillik sari intilish shaxsning kasbiy shakllanishi bilan birgalikda yaxlit holda kechadigan va deyarli bir umr davom etadigan murakkab jarayondir. Keng ma'noda kasbiy shakllanish deganda insonning o'z aqliy qobiliyatlari, jismoniy imkoniyatlari, u yoki bu sohaga bo'lgan layoqatlari, qiziqish va intilishlari, shuningdek, qadriyat va dunyoqarashlariga ko'ra biron-bir kasb sohasida ta'lim olishi, keyinchalik shu sohaga kirishib, moslasha borishi va nihoyat yillar davomida yetuk va malakali mutaxassis bo'lib etishishi tushiniladi. Haqiqatdan ham bu cheksiz murakkab, orqaga qaytarilmaydigan, muhim jarayon bo'lib, undan inson manfaatlari yo'lida unumli foydalanishni tashkil etish, bugungi kunning eng dolzarb masalalaridan biridir. Agar inson bu murakkab jarayonda to'g'ri qabul qilish orqali o'zi uchun eng munosib kasbni tanlasa va ushbu kasbning yetuk mutaxassisi bo'lib yetishsa, ham o'zi uchun, ham jamiyat uchun har tomonlama foydali bo'ladi. Chunki, inson qachonki o'z sevgan kasbi bilan shug'ullanar ekan uning ish faoliyatida samaradorlik shunchalik yuqori bo'ladi. Aks holda, inson ish faoliyati hech qanday samaradorlik va yutuqlarga erisha olmaydi. Shu bilan birgalikda, inson umri davomida

faqatgina moddiy manfaatlarini koʻzlab, oʻzi uchun qiziq boʻlmagan kasb bilan shugʻullanishi uning ruhiy holatiga ham salbiy taʼsir qilmasdan qolmaydi. Aynan shunday muammolar yuzaga kelmasligi uchun farzandlarni bolalik chogʻidanoq otalar ularning qiziqishlari qaysi sohaga koʻproq moyilligiga eʼtibor berib, ulardagi bu qiziqishni yana rivojlanishiga yordam berishlari lozim. Keyinchalik bu qiziqishlarga maktabda turli trening va metodik oʻyinlar yordamida bolaning ustozlari tomonidan yanayam aniqlik kiritilib, bolaning oʻzi uchun maqul kasbni tanlashiga yordam berilib, kelajagi uchun eng muhim boʻlgan kasb-hunar tanlashdagi qarorni toʻgʻri qabul qilishiga yordam berishlari, bolaning kelajakdagi oʻz kasbi yoki hunarining yetuk mutaxassisi boʻlishiga sabab boʻladi. Har tomonlama yetuk va malakali mutaxassislar esa jamiyatimiz taraqqiyoti uchun juda ham zarur. Shunday ekan yoshlarni kasb-hunarga yoʻnaltirish masalasiga jiddiy eʼtibor qaratish lozim

Foydalanilgan adabiyotlar:

1. Oʻzbekiston Respublikasi Prezidentining “Oʻzbekiston Respublikasi Xalq taʼlimi tizimini 2030-yilgacha rivojlantirish konsepsiyasini tasdiqlash toʻgʻrisida”gi Farmoni. 2019-yilning 29-aprel.
2. A.Zokirov, K.Farfieva, G.Burxonova, S.Alimxodjaeva. Kasb-hunarga yoʻnaltirish jarayonida oʻquvchi shaxsini oʻrganish metodikalari.- T: 2006 yil
3. V. Karimova “Psixologiya” Toshkent. 2002 yil
4. M.Abdullajonova, M.Isoqova, M.Zokirova, S.Isroiljonova Ijtimoiy psixoloik trening prktikum. – Fargʻona: “Fargʻona” nashriyoti, 2003 yil
5. Y.Asadov. “Oʻquvchilarni kasb-hunarga yoʻnaltirishda qoʻllaniladigan psixologik-pedagogik tashxis metodikalari”. Toshkent. 2010 yil

ELEKTRON TAʼLIM RESURSLARI

1. <http://www.edu.uz> - Oʻzbekiston Respublikasi Oliy va oʻrta maxsus taʼlim vazirligi portali.
2. <http://www.uzedu.uz> - Oʻzbekiston Respublikasi Xalq taʼlimi vazirligi portali.
3. [http:// www.rtm.uz](http://www.rtm.uz) – Respublika taʼlim markazi sayti